

Tunngaviusumik inatsisissaq pillugu isumalioqatigiisitap unitsinnissaa, kiisalu isumalioqatigiisitami sulinerup unitsinneqarnissaa pillugu Inatsisartut aalajangiineranniit atuutilersussamik Naalakkersuisut peqquneqassasut Inatsisartut aalajangiiffigisassaattut siunnersuut.

(Inatsisartunut ilaasortaq Aqqalu C. Jerimiassen, Atassut)

Akissuteqaat

(Naalakkersuisut Siulittaasuat)

Tunngaviusumik inatsisissaq pillugu isumalioqatigiisitami sulineq maanna ingerlasoq Naalakkersuisut unitsissagaat, kingornalu piaarnerpaamik atorunnaarsissagaat siunnersuuteqartup kissaatigaa.

Ulloq 21. november 2016 kalaallit tunngaviusumik inatsisissaattut siunnersuummik suliaqarnissaat siunertaralugu tunngaviusumik inatsisissaq pillugu isumalioqatigiisitamik pilersitsissasut Inatsisartut Naalakkersuisut piginnaatippaat.

Tunngaviusumik inatsisissaq pillugu isumalioqatigiisitap tunngaviusumik inatsisissamut missingiut suliarileruttorpaa. Missingiummi taassuma qanoq Kalaallit Nunaanni tunngaviusumik inatsisissap isikkoqarsinnaaneranut siunnersuummik naammassinninnissaq siunertaavoq. Taamaaliornikkut innuttaasunut politikernullu oqallisissamut sukumiisumik tunngavissaqartoqalissaaq.

Naalakkersuisut arlaleriarlutik isumalioqatigiisitap suliaa pingaartillugu oqaatigisarpaat. Tunngaviusumik inatsit naalagaaffimmut namminersortumut politikikku sinaakkusiivoq. Nunatsinni tunngaviusumik inatsit, innuttaasut pisinnaatitaaffiiniq qulakkeerinnittoq, inuiaat kalaallit kulturiannik sinaakkusiisumik kinaassutsimillu aallaaveqartoq. Soorlu naalakkersuisooqatigiinnermi isumaqatigiissummi takuneqarsinnaasutut, sulineq inuusaatsitsinnik kulturitsinnillu aallaaveqarpoq.

Tunngaviusumik inatsit pillugu isumalioqatigiisitami suliaq maanna unitsissagutsigu suliaq annertoq isumalioqatigiisitami maannamut suliarineqartoq asuliinnassaaq.

Allatut oqaatigalugu tunngaviusumik inatsisissamut missingiut siunissami inatsisigiimaagassatsinnut tunngavissiisussaavoq, taamaalilluni namminiilivinnissap tungaanut sulineq pitsaasumik tunngavissaqaqqullugu.

Tunngaviusumik inatsisissaq pillugu isumalioqatigiisitap kalaallit tunngaviusumik inatsisissaattut missingiummik kingusinnerpaamik ulloq 31. december 2022 Naalakkersuisut tunniussinissani siunertaralugu suliaminik ingerlatsivoq. Soorlu tamanna inatsisartut aningaasanut inatsit 2021 aqutigalugu aamma sinaakkusersimagaat.

Tamanna tunuliaqutaralugu siunnersuutip itigartinneqarnissaa tunngaviusumillu inatsit pillugu isumalioqatigiisitap suliaminik inaarsinissaa Naalakkersuisut inassutigaat.